

Inicijativa za donošenje Pravilnika o izmjenama i dopunama Pravilnika o obliku, sadržaju i načinu vođenja trgovačke knjige

Član 1.

U Pravilniku o obliku, sadržaju i načinu vođenja trgovačke knjige („Službene novine Federacije BiH“, broj: 91/15 i 97/17), u članu 12. u stavu 2. iza tačke dodaje se nova rečenica koja glasi:

„Ako se trgovačka knjiga vodi elektronski, štampanje kalkulacije vrši se samo na zahtjev inspektora, radi dostupnosti evidencije prilikom inspekcijskog nadzora.“

Obrazloženje

Prema Pravilniku o obliku, sadržaju i načinu vođenja trgovačke knjige („Službene novine FBiH“, broj: 91/15 i 97/17) postoji obaveza ovjere potpisom i pečatom tačnosti izrađene kalkulacije cijena koja se sastavlja za svaku nabavljenu robu.

Istim Pravilnikom data je mogućnost vođenja trgovačke knjige elektronskim putem, a izmjenama i dopunama Pravilnika iz 2017. godine propisana je obaveza štampanja podataka iz knjige koja se vodi elektronski samo prilikom inspekcijske kontrole na zahtjev inspektora.

Također, izmjenama i dopunama Pravilnika omogućeno je da se trgovačka knjiga koja se vodi elektronski zaključuje štampanjem početne strane i krajnjeg salda, koji se ovjerava potpisom odgovornog lica i pečatom.

Obzirom da je Pravilnikom data mogućnost vođenja trgovačke knjige elektronskim putem i štampanja podataka samo na zahtjev inspektora smatramo da bi trebalo **omogućiti i štampanje kalkulacija samo na zahtjev nadležne inspekcije (ukoliko trgovac ima mogućnost elektronske izrade, evidencije i pohrane kalkulacija).**

Cilj predložene izmjene je **ušteta troškova štampanja i ovjeravanja, ušteta papira, te ušteta prostora za arhiviranje kao i smanjenje administrativno tehničkih poslova.**

Propisivanjem mogućnosti štampanja kalkulacija cijena samo na zahtjev nadležne inspekcije ispunili bi se prethodno navedeni ciljevi i u velikoj mjeri bi se olakšalo poslodavcima, a s druge strane neće se narušiti zakonitost i transparentnost njihovog rada.

U nastavku ćemo prikazati troškove izrade kalkulacija koje ima jedna kompanija na godišnjem nivou:

Broj kalkulacija za 01.10.2017-30.09.2018.	87.888
Broj listova po kalkulaciji cca	15
Ukupno listova kalkulacije	1.318.320
Troškovi tonera 1 - 5000 listova (135 KM)	35.594,64
Papir 500 listova (4,60 KM)	12.128,54
Registrator 500 listova (2,40 KM)	6.327,94
Troškovi radnika (broj kalk x 3 min x 0,19KM/min bruto h PL/ZPL)	50.096,00
Ukupno troškovi	104.147,12

Naš prijedlog je u potpunosti sa reformskim opredjeljenjem Vlade FBiH koja se obavezala da će usmjeriti svoje aktivnosti na unapređenje poslovnog okruženja kako bi se privukle investicije, otvorila nova radna mjesta, te povećao rast ekonomije. Te aktivnosti između ostalog podrazumijevaju i smanjenje, odnosno ukidanje parafiskalnih nameta. Obaveza ovjere potpisom i pečatom kalkulacije cijene je potpuno bespotreban namet i izmjenom Pravilnika se neće nanijeti šteta Budžetu, niti se smanjiti kvalitet inspekcijske kontrole. Naprotiv, smatramo da će se izmjenom unaprijediti sistem kontrole, jer je lakše i preglednije pratiti kalkulacije cijena koje su elektronski pohranjene.

Također, na osnovu uporednopravne analize zakonodavstava država iz okruženja došli smo do zaključka da obaveza ovjere potpisom i pečatom kalkulacije cijena nije predviđena u *Zakonu o unutrašnjoj trgovini* i *Pravilniku o obliku i načinu vođenja popisa robe u trgovini na malo u Republici Hrvatskoj*, u *Pravilniku o obliku i načinu vođenja trgovačke knjige Crne Gore*, kao ni u *Zakonu o trgovini* i *Pravilniku o evidenciji prometa* koji su na snazi u Republici Srbiji. Mi nismo našli da ova obaveza postoji u zakonodavstvima zemalja Evropske unije.

Shodno navedenom, molimo vas da razmotrite našu inicijativu i izmijenite Pravilnik kako je predloženo.

Član 2.

U članu 19. u stavu 6. iza tačke dodaje se nova rečenica koja glasi:

„Ako se trgovačka knjiga vodi elektronski, štampanje kalkulacije vrši se samo na zahtjev inspektora, radi dostupnosti evidencije prilikom inspekcijskog nadzora.“

Obrazloženje

Isto kao i obrazloženje za član 1.